

Allschwiler Fasnacht

Postfach 1406
www.allschwiler-fasnacht.ch

Prolog Plakette Fasnacht 2014

Mischtstögg, Buure, Güllewääge
Chirsi, Chrutt, ä ryche Sääge.
Hie und do ä Pfuscht uf d'Schnurä
Chaibe gmietlich neume durä.
S'Drämmli hett no s'Nüni dreit
Me hett ä Jedem „Salli“ gseit.

Dasch Allschwil gsi, ä gwöhnlichs Kaff
Doch lueg hüt umme, gäll bisch baff.
Denn langsam hett sich s'Reedli drüllt,
Hänn d'Hügel sich mit Hütte gfüllt
Hüt tschumplet Jede näbe dir duure
Und hett, wenn dä Päch hesch, no ä dummi Schnuure.

Dr Nüner muess em Säggser wyche
Statt Gäul dien Blächröss ummeschlyche
Churz und schlächt, s'isch nümme wie friener,
Allschwil wird grau, nur's Tram wird griener
Und wenn Land wotsch, inere schöne Zone
Muesch Chölle ha und zwar Millione!

S'wird baut und baut, es isch zum Briele
In jeder Matte dien si wiehle
D'Chläpf, die stöhn tagtäglich Schlange
Ussbuff an Ussbuff, Stange an Stange
Dr Gschtangg schlot jedem uff dr Maage
„Buff“ chasch däm Zuestand nur no sage.

Ä so hän d'Wällesittich, si hän nit übertriebe
Vor über 30 Jahr scho unser Dorf beschriebe.

Drum plant me jetze riese gross
Dr Usbau vo dr Baslerstross
Mit Velowäg und Kap-Haltstelle
Über 50 Millione, duet me uns verzelle
Will me das Chaos ändlig in Griff becho
Mir froge uns, wie sell das goh?

D'Lösig heisst: „Jä nundefahne
Ä zweiti Ebeni muess z'Allschwil aane
Vom Dorfplatz, denn durch d'Binnigerstross
Zum Morgartering, das wär famos
Unterm Bachgrabe duure, nach Hegeheim
Und über Häsige, Neuwill, denn wieder heim“

Mit andere Wort, ganz im Vertraue
Allschwil mues ä U-Bahn baue.
Denn dien d'Vögel wieder uf em Dorfplatz zwitschere
Und s'Bachwasser gsehn mir offe s'Dorf abglitzere
Wydestöck und Pappete selle denn wie friener
S'Bachbord bilde und Allschwil wird griener.
Drum heisst s'Motto für das Fasnachtsjahr
S^wär d'Realität und isch wahr:

**„Ä U-Bahn für Allschwil - das wär ä Hit.
Kap-Haltstelle bruche mir nit.“**